

L servije de assistenza sun 24 ores

Luigi Chiocchetti à portà te Consei provinzièl na mozion per domanèr che te Fascia vegne arsegurà l servije infermieristich spezialisà di e net

Sanità - L derit a la sanità e a l'assistenza sanitàa califichèda l'è n derit per duc i zitadins e a duc l cogn ge vegnir garantì aldò del besegn. Su la basa de chest pensier l conseier Luigi Chiocchetti à portà dant na proponeta de mozion sul servije infermieristich de prum socors te val de Fascia. La mozion, aproèda dal Consei provinzièl ai 4 de november, domana a la Jonta che vegne metù a jir scomenzadives che garantisce la califcazion de l'assistenza sanitàa te situasions de urgenza-emergenza te Fascia. L'obietif l'è chel de ruèr, ence travers projec sperimentèi de neves modie organisatives per la gestion de la emergenges sanitàes, a slarièr fora l model de assistenza 24 ores sun 24 per dut l'an aló da la postazion del 118 de Poza, ence per ge dèr l'atuazion al protocol sotescrit del 2008.

L prinzip fundamentèl de la programazion sanitàa provinzièla – scif Chiocchetti tel document - l'è la valorisazion del teritorie travers la promozion e l dezentràment di servijes per resoner miec che l'è meso ai besegnes locai, per garantir na assistenza sanitàa percanta e segura. Ge vel donca lurèr per meter a jir mesures organisatives che cree maor balanzament te la perferida di servijes sanitàes, soraldut per i intervenc olache l fator temp l'è determinant, e a outes vel dir vita o mort.

Enceben che vegne recognosciù l bon livel de la sanità trentina provinzièla, ge vel uzèr fora che la realtèdes periferiches padesc amò de vèlch mencianza, smaorèda da la distanza da ospedèi e zentres spezialisé. Tel servije de urgenza-emergenza se à vedù che ti ùltime egn l'è cresciù dò e dò l numer de jent che se ouc al servije de prum socors de l'ospedèl de Ciavaleis, soraldut endèna te sajón, per via

de l'aut numer de ghesé e de l'ativitèdes sportives (soraldut schi).

L servije infermieristich spezialisà, cour la fascia oraria del di (da les 8 a les 20) enveze la nets vegn corides demò vèlch vender e sàbeda, per n total de 50 nets sun 365. Vegn fora che sun 365 nets, 315 cogn vegnir corides dai voluntères de la Crousc Checena e Crousc Biencia. Demò l 14% di intervenc de codesc checen e šal de la net vegn corì dal servije de emergenza infermieristich spezialisà, l 86% resta descori. Se conscidron i dac de l'an 2008, i evenc de net de codesc checen e šal é stac 311 sun 1631, desche dir l 19%, e che de chisc ben 268 é resté descorii dal servije H24.

Doventa donca ence n besegn di voluntères medemi chel de aer apede personal calificà e che sapie resoner a la emergenges, te situasions particulères, ge tolan jù chela responsabilità che i no pel e no i cogn se tor sù enstesc.

Jà tel protocol sotescrit ai 9 de mé del 2008 anter l'Assessor provinzièl a la sanità e i presidenc del Comitad de Distret de Fascia e Fiem – scif Chiocchetti – se metea al luster l problem e se emegnèa l'Azienda sanitàa a verifichèr la possibilità de arsegurèr, aló da la postazion del 118 de Poza, n model de assistenza 24 ores sun 24: n servije che é stat metù a jir sun gran pèrt del teritorie de la provinzia ma che mencia amò te Fascia.

Per chest ades Chiocchetti à prejentà la proponeta de mozion, aproèda dal Consei de la Provinzia de Trent, per ge domanèr a la Jonta che vegne verificà l'atuazion del protocol e garantì la califcazion de l'assistenza sanitàa te situasions de urgenza-emergenza te Fascia per ruèr a slarièr fora l model de assistenza 24 ores sun 24.